



E rivà une vuere e un ciert Vigji al domandà se al podeve lâ, di volontari. Ducj i faserin une vore di compliments. Vigji al le dulà che a devin lis sclopis, 'nt cjapà sù un e al disè: - cumò voi a copâ un ciert Bepi.

I domandarin cui che al jere chest Bepi.

- Un nemì - al rispuindè, - un nemì che o ai jo. Chei i faserin capî che al veve di copâ i nemîs di une certe cualitât, e no chei che i plasevin a lui.

- E ce? - al disè Vigji - Mi cjapaiso par stupit? Chest ciert Bepi al è propit di chê cualitât e di chel paîs. Cuant che o ai savût che i fasevis la vuere cuintri, o ai pensât: o ven ancje jo, cussì o pues copâ Bepi. Par chel o soi vignût. Bepi jo i lu cognòs: al è un farabut e pâr pôcs bêcs mi à fat fâ une brute figure denant di une. Son robis vieris. Se no mi crodês us conti dut tal particolâr.

Ma lôr i diserin che sî, i leve plui che ben cussì.

- Alore - al fasè Vigji - spiegaitmi dulà che al è Bepi, cussì o voi daurmân a combati.

Lôr i diserin che no lu savevin.

- No impuarte - al disè Vigji, - mi fasarai spiegâ. Prin o dopo lu cjati ben.

Chei i diserin che no si podeve, che lui al veve di fâ la vuere dulà che lu metevin lôr, e copâ cui che i capitave a tîr, di Bepi o no Bepi lôr no savevin nuie.

- Viodêt - al insisteve Vigji - bisugne propit che us conti.

Percè che chel li al è propit farabut e voaltris o vês di fâi la vuere.

Ma chei altris no volevin savênt. Vigji nol rivave a dâsi

padin: - Scusait, par voaltris se us copi un nemî o se us copi un altri no isal compagn. A mi, invezit di copâ cualchidun che cun Bepi nol à nuie a ce fâ, mi splâs.

Chei altris a pierderin la pazience. Cualchidun i spiegà

cetantis resons e cemût che e jere fate la vuere e che un nol podeve lâ a cirîsi il nemî che i pareve a lui.

Vigji al tirà sù il mustic. - Se al è cussì - al disè - no mi va ben.

- Cumò tu sês e cumò tu stâs! - i businarin chei.

- Avanti-march, un-duè, un-duè! - E lu mandarin a fâ la

vuere. Vigji nol jere content. Al copave nemîs, cussì, tant par viodi se i capitave di copâ ancje Bepi o cualchi so parint. I devin une medaie ogni nemî che al copave ma lui nol jere content. - Se no copi Bepi - al pensave - o ai copât tante int dibant. - E i vignive il rimuars. Intant i devin medaiis su medaiis, di ducj i materiâi.

Vigji al pensave: - Cope vuê cope doman, i nemîs a calaran e e vignarà la volte di chel farabut.

Ma i nemîs si jerin rindûts prin che Vigji al ves cjatât

Bepi. I vignî il rimuars par vê copât tante int dibant, e si come e jere la pâs, al metè dutis lis medaiis intun sac a al zirà ator pal paîs dai nemîs a regalâlis ai fiis e a lis feminis dai muarts.

Zirant in chê maniere i capità di cjatâ Bepi.

- Ben - al disè - miôr tart che mai - e lu copà.

E cun chê lu meterin in pereson, lu processarin par omicidi e lu picjarin su la forcje. Al procès al leve indevant dome a ripeti che lu veve fat par metisi a puest la cussience, ma nissun i abadave.

***Conte misteriose... di induvinâ tai coments
voltade dal Ostîr***